

**BOSNA I HERCEGOVINA
PARLAMENTARNA SKUPŠTINA
BOSNE I HERCEGOVINE
DOM NARODA**

Broj:02-011-171/'00
Sarajevo, 06.07.2000.god.

Z A P I S N I K

**19. sjednice Doma naroda Parlamentarne skupštine Bosne i Hercegovine
održane 06.07. 2000. godine**

Sjednica je počela u 12,20 sati.

Sjednicom je predsjedavao Drago Ljubičić, predsjedavajući Doma naroda Parlamentarne skupštine Bosne i Hercegovine.

Na sjednici Doma bilo je 10 delegata.

Svoj izostanak opravdali su Šefik Džaferović, Momir Malić, Ristan Ristić i Zoran Marić.

Nakon što je utvrdio da ima kvorum, predsjedavajući je predložio sljedeći

DNEVNI RED

1. Usvajanje zapisnika 18. sjednice Doma naroda;
2. Nacrt zakona o finansiranju političkih stranaka u BiH (predlagači: poslanici Nikola Špirić i Ibrahim Đedović);
3. Prijedlog poslovnika Doma naroda Parlamentarne skupštine BiH;
4. Prijedlog programa rada Doma naroda Parlamentarne skupštine BiH za 2000. godinu
5. Delegatska pitanja

U raspravi je učestvovao Đoko Pajić, predlažući da 5. tačka dnevnog reda Delegatska pitanja nosi naziv Delegatska pitanja i inicijative. S obzirom na to da su se delegati složili s ovim prijedlogom dnevni red je usvojen jednoglasno.

AD.1. Usvajanje zapisnika 18. sjednice Doma naroda

U raspravi o zapisniku niko nije učestvovao.

Zapisnik 18. sjednice usvojen je jednoglasno.

AD.2. Nacrt zakona o finansiranju političkih stranaka (predlagači poslanici Nikola Špirić i Ibrahim Đedović)

U raspravi su učestvovali Ivo Živković, Mugdim Herceg, Avdo Čampara i Đoko Pajić.

Jednoglasno je usvojen sljedeći zaključak: Usvaja se Nacrt zakona o finansiranju političkih stranaka u BiH. Nacrt zakona može poslužiti kao osnova za izradu prijedloga zakona, uz obavezu predlagača da prilikom izrade Prijedloga zakona uzme u obzir primjedbe i sugestije iznesene u raspravi.

U okviru ove tačke dnevnog reda osuđeno je neprisustvovanje predstavnika Predsjedništva BiH i Vijeća ministara BiH sjednicama Doma naroda i od njih se traži da ispoštoju svoju obavezu prisustva sjednicama Doma naroda.

AD.3. Prijedlog Poslovnika Doma naroda Parlamentarne skupštine BiH

U raspravi niko nije učestvovao.

Jednoglasno je usvojen Zaključak da delegati u roku od tri dana, do ponedjeljka 10. jula 2000. godine, dostave Kolegiju Doma naroda amandmane u pisanoj formi kako bi se Kolegij o njima izjasnio i za 20. sjednicu pripremio Poslovnik za usvajanje.

AD.4. Prijedlog programa rada doma naroda Parlamentarne skupštine BiH za 2000. godinu

U raspravi niko nije učestvovao.

Jednoglasno je usvojen Zaključak: Usvaja se Program rada Doma naroda za 2000.godinu, u istovjetnom tekstu, kao u Predstavničkom domu, s tim da će prijedlozi ministra Mirsada Kurtovića postati sastavni dio Programa rada, ukoliko ih podrži Vijeće ministara.

AD.5. Delegatska pitanja i inicijative

Delegat Izet Žigić postavio je dva pitanja, jedno Predsjedništvu BiH, a drugo predsjedavajućem Vijeća ministara:

1. Ko je predsjedavajući Vijeća ministara i kakva je njegova biografija?
2. Ko su članovi Vijeća ministara i kakve su njihove biografije?

Delegat Đoko Pajić je podnio inicijativu da Dom naroda donese sljedeći zaključak:

“U cilju zaštite osnovnih ljudskih prava i sloboda, zagarantovanih Evropskom konvencijom za zaštitu osnovnih ljudskih prava i sloboda kao i ravnopravnosti sva tri konstitutivna naroda i svih građana BiH, a sve u funkciji obezbjeđenja sprovođenja slobodnih i demokratskih opštih izbora u BiH, najavljenih za 11.novembar 2000.godine, od Misije OEPS-a i Privremene izborne komisije za BiH, tražimo:

1. Da svim političkim strankama i partijama, koje su u BiH, koje su uredno i po važećim zakonskim propisima registrovane kod nadležnih sudova, dozvole izlazak na predstojeće opšte izbore BiH, a pod uslovom da su u predviđenom roku podnijele prijave i sva dokumenta, predviđena Pravilima i propisima Privremene izborne komisije.

2. Da Misija OEPS-a povuče najavljenju zabranu izlaska na predstojeće opšte izbore pojedinim političkim strankama i partijama i njihovim članovima, bez argumentovanih dokaza da rade i djeluju mimo interesa naroda BiH i da krše odredbe Dejtonskog mirovnog sporazuma.

3. Prihvatanjem ovog zaključka, Misija OEPS-a bi zajedno sa svim institucijama BiH i njenih entiteta, znatno doprinijela unapređenju osnovnih ljudskih prava i sloboda u BiH, kao jednom od preduslova za prijem BiH u Vijeće Evrope.”

S obzirom na to da se delegati nisu složili oko ove inicijative predloženo je da delegat Đoko Pajić ovu inicijativu dostavi Domu naroda u pisanoj formi.

Delegat Mugdim Herceg postavio je sljedeće zahtjeve i inicijative Vijeću ministara BiH i Ministarstvu za ljudska prava i izbjeglice, kako bi se direktno uključili u rješavanje problema Bočinje:

- a) da se domaći stanovnici, privremeno nastanjeni u Bočinju, destiniraju u mjesta iz kojih su oni došli, a došli su iz Žepča, Zavidovića, Travnika, Zenice, Kaknja, itd., ali i iz Republike Srpske, iz koje su određena lica izbjegla, raseljena ili protjerana.
- b) Da Ministarstvo za ljudska prava i izbjeglice, za državljanje BiH, stranog porijekla i strance, izvrši provjere validnosti boravka tih ljudi u BiH, da izvrši provjere da li su sa lista Interpola, da li su oni osuđeni u svojim zemljama. Za one koji ne ispunjavaju, sa stanovišta zakona, uslove za ostanak u BiH obezbijediti destinaciju po sistemu disperzije, a za one koji ispunjavaju uslove da ostanu u BiH, da se obezbjede destinacije ravnomjerno na teritoriji BiH.
- c) Da u koordinaciji sa Vladom Federacije BiH, resorno ministarstvo i Vijeće ministara, obezbijedi provođenje već urađenog programa i dinamičkog plana za rješavanje ovog pitanja, poštujući zakon i zakonske procedure i obezbjeđujući bezkomfliktnost rješavanja ovog pitanja u ovom regionu.
- d) Da se obezbijedi i preuzme koordinacija sa Vladom Zeničko-Dobojskog kantona, na rješavanju ovog vrlo krupnog i značajnog pitanja, da se pojača aktivnost prema međunarodnoj zajednici u cilju obezbjeđenja podrške projektu rješavanja problema Bočinje i privremeno nastanjenih stanovnika u ovom naselju.

Delegat Mugdim Herceg zahtjeva i traži da bude do prve redovne sjednice u septembru 2000. godine, pismeno obaviješten i informisan o planu aktivnosti koje će poduzeti Vijeće ministara i resorno ministarstvo u rješavanju problema Bočinje, odnosno o mjerama koje su poduzete u periodu od upućivanja ove inicijative i zahtjeva do prve redovne sjednice u septembru 2000. godine.

Delegat Vinko Zorić postavio je tri zahtjeva i jedno pitanje:

1. Da na jednom prijemnom štambilju bude naznačen Dom naroda, a na drugom prijemom štambilju Predstavnički dom, a ne samo da bude jedan prijemni štambilj sa naznakom Parlamentarna skupština Bosne i Hercegovine.
2. Da se materijali dostavljaju na hrvatskom jeziku.
3. Da se delegatima u Domu naroda dostavi kopija pisma profesora dr. Zdravka Tomca, kako bi se vidjelo kome je upućen poziv za posjetu, a koja je učinjena Saboru Republike Hrvatske.
4. Ko su članovi i šta je to Komisija za vanjska pitanja Parlamentarne skupštine BiH, s obzirom na to da takve Komisije nema, nego ima Komisija za vanjska pitanja Doma naroda i Komisija za vanjska pitanja Predstavničkog doma Parlamentarne skupštine BiH?

Predsjedavajući Doma naroda Drago Ljubičić je, s obzirom na probleme koji se javljaju oko sastava delegacija Parlamentarne skupštine BiH i njihovog odlaska u inostranstvo ispred Parlamentarne skupštine BiH, predložio sljedeći zaključak: da se traži od Kolegija Predstavničkog Doma sazivanje zajedničke sjednice kolegija oba doma kako bi se obavila rasprava i usaglasili stavovi oko sastava delegacija koje predstavljaju Parlamentarnu skupštinu BiH.

Zaključak je jednoglasno usvojen.

Sjednica je završena u 13. 45 sati.

Magnetofonski snimak čini sastavni dio Zapisnika.

PREDSJEDAVAJUĆI
DOMA NARODA
Drago Ljubičić s.r.